

太

函

集

太函集卷之一百八

新都汪道昆伯玉著

五言古詩二十六首

登南山過李太白訪許宣平故址

有何薪者翁云是箕山裔家在南山巔居然避塵世  
清醑近市來白日蓬門閉矯矯謫仙人言從秋浦溼  
振衣問大隗握手探右契潁水薄函關祖風良已厲  
仙才豈雉樊吾道信蟬蛻所貴在同心無言竟分袂  
騎鯨出九淵化鶴歸千歲故址山之阿至今留薜荔  
二三小有池深凜神魚麗吾黨采真游踟躕復流睇

刀圭尚可求羽翼從此逝

社日集太函兼送景升北上

白榆延肅爽鴻鴈邇來賓南郭閼柅源居然託隱淪  
相君宰爲社往往出城門綢繆二三子睠此平生親  
冠蓋何方來東西南北人虎林兼象郡三吳暨七閩  
殷勤命杯酌意氣良一伸懷中出哭乘五夜光無垠  
旦暮遇千古謳歌動四隣于愍者誰子世系本安仁  
墳與破鴻濛聲詩泣鬼神黑貂一再敝裹足不入秦  
仰視北辰居紫氣亘嶙峋金臺一何峻駿骨亦已陳  
長揖別同盟脂車北問津當筵歌慷慨秋水照青萍

豈無楊得意不望屬車塵橋門麗閭闔跬步可致身  
勉矣應昌期中原正獲麟

立秋日郭次父掃三詔洞汲中流水烹茶遲余  
及二仲若諸子同過

亭亭浮玉山百仞凌江汜其陽嵌洞天谿訝石齒齒  
中有真人居三詔竟不起游仙郭景純高臥雲烟裡  
遺世得比鄰侵晨敦杖履商風何處來新蟬忽盈耳  
芝童雙玉鉗縞引中流水顧渚供乳花博山焚柏子  
青鳥尺一書新詩清且旨願降三茅君旁招漢黃綺  
結臂入朝儕臨堦勞倒屣迓我白鹿車隱我烏皮几

班荆錯坐儀默默窺無始洞口出天人縞衣當戶倚  
茗椀致殷勤佩纓何旖旎坐起倚孤桐脩然立不泮  
金鰲浮上游鐵甕錮西趾憑陵江漢流呼吸三萬里  
須臾日高春暑氣猶未彌有約上巖栖與君薙荆杞

古意送肇邵應試南都

公族富姬姜季蘭方待字蹇脩三及門匹鴈相將至  
所貴在徽音蛾眉何足恃盈盈十二樓二八遞更侍  
豈乏傾國姿誰其贊宗祀是時鶉火中牛女俱進次  
夫婿擬授綏衿肇猶在笥薄言將渡河象服從今試  
頭上金雀釵趑趑揚雙翅耳畔大秦珠夜光連結駟

六銖金縷衣出自鮫人肆金車勿徐徐睠彼耽耽視  
牽牛豈虛名磐石申吾志

千秋里中述事

秋原具已腓夜水逝將蟄白日揭朝躋紺林延暮色  
伊余返故廬言托西枝息旦日命所歡結臂之南陌  
沿流任踏歌踞石恣分席閣夜罷焚膏白榆何歷歷  
始作華胥游俄驚風雨入草野戰羣龍倉皇翻四極  
礫格撲匡牀支撐盤霹靂冥冥失寢興凜凜屏呼吸  
危坐擁綈袍塊然待終夕

贈廣文先生龍君御

結髮對公車丁年守經術爰書豈不嫺直道一以黜  
鼓篋擁青袍絃歌銷白日三鱣歲再徂獨冷不遑恤  
稽古諒非榮逢時殊自失長沙傳賈生駒隙一何疾  
之子願加餐前席虛宣室

其二

日出東南隅天光發暘谷廣文卧高齋圭竇常若木  
斗口天鷄鳴暘烏升比屋董生獨下帷沉冥信雌伏  
紛紛俠少徒鼎寶分公餽白簡下金張鑿刃乘尸祝  
云胡失飛黃甘與蟾蜍逐

其三

游龍何矯矯童角起重淵一息當雲門三農大有年  
誰其摧羽翼天步卻無前棄置赤水濱泥蟠自蜿蜒  
玄珠猶在握睥睨滄浪天東面望龍宮落迦千仞懸  
何時迴夜水赤電繞神鞭

其四

繁霜忽已厲落木與之俱啓戶視晨星寥寥散白榆  
金門下方朔宛在海東隅燭火揚末光纍纍照乘珠  
乘風競向榮而獨集於枯斗下少微星蒼茫隱五湖  
參辰不相見顧望心煩紆

送吳翁秭



歷歷白榆社蕭蕭木葉乾駢駢客子行媿媿勤加食  
鵲旦寂無聲昆蟲墮歲寒客行良已苦况復衣裳單  
白雪少知音洋洋爲我彈曲終一揮手將毋不遑安  
何以奉高堂咸池青琅玕行行日苦短猶得及椒盤

其二

芳椒一何烈春酒一何醇元日王正月條風雪水濱  
褰幃起爲壽椒酒醕新陳堂背幸無憂擔簦入成均  
樂哉鸛鳩氏夙昔韓衆親大隱居朝市和光混風塵  
眈眈下白屋之子居上賓倒屣日三接薄言和陽春  
千秋幸一遇旦暮成參辰國士酬知己長虹氣未伸

其三

燕臺徵國士高視主孫陽齊楚控雙龍吳越當鴈行  
蹇予釋繁纓赤立如堵墻季子汗血駟承家步驢驢  
吳門一疋練來自渥洼傷所志在超忽周巡遍八荒  
迄今淹伏櫪仰秣群牛羊邈彼龍爲友恨云星在房  
胡兒歲款關胡爲日玄黃何不策高足翩翩入上方  
千金懸一顧驤首待張皇

其四

吾道餘煨燼張皇兩漢京 聖朝二三子空谷振希  
聲北地輔三秦居然百二城大風何泱泱九合伯齊

盟遵海出瑯琊吞天吐蓬瀛輕身投赤水入手玄珠  
擎舉網徒紛集伊誰更取羸楚江得萍實足以當大  
烹泛泛水中鳬沿流時一鳴我有綠綺琴因之贈遠  
行如逢楊得意跬步入承明

嚴陵送龍博士君御

盟言在牛斗奄忽成參辰一繫漸江曲一躍甌泮濱  
五年不一見耿耿難重陳北極揭文昌橋門圍搢紳  
傳經誰氏子溟海召波臣投杼赴尚方逡巡天漢津  
牽牛沿上游犢鼻出風塵相距三百里招邀以陽春  
綢繆一以結契闊一以申執手不須更關河芳艸新

袞衣幸無缺端冕職經綸爾天孫錦無庸投市人  
少微匿天末萬里尚爲鄰

其二

矯矯雙飛龍同聲吼風雨胡爲失其雄越在西江潯  
大旱若爲霖江南俱赤土守雌且安居行者殊自苦  
夜氣半沉冥吞聲不復吐鉛刀饗特牲歐冶安足數  
真宰幸見知斲之當狐父三千短後衣攘攘對起舞  
爾來居上頭霜刃良可撫一旦合延津雌雄雙栩栩  
余從帝所歸偃蹇依玄扈爾作辟雍遊甘泉天尺五  
皇輿正清夷當御無些竅去去報張華潛夫亦千古

其三

趙璧矜連城卒爲傳國璽荆人亦何辜三獻三滅趾  
珞琤互相踰升沉有如此夫君意氣殊蜿蜒白虹起  
南國薦瑤琨新都都且美青蠅迴不緇當路竟爲抵  
棄置天一隅鮫人托鄰里國工須楚材逐逐徵南紀  
昔爲鼠與腊今爲簠與簋群公集大廷鳴佩中宮徵  
咫尺天門開蹢躅從此始結佩貴無聲有聲振人耳

贈胡元瑞

弁山幾千仞高揭白雲鄉中有真人居玉佩錦衣裳  
餐霞赤城標稅駕赤水傍何物安期生羽翼凌風翔

三閼池上華一繡柱下藏主人愛敬客坐以涼風堂  
傾耳談天口居然踞華陽千秋結盟言努力毋相忘  
飛鶴倏已逝笙聲殊未央伊人有仙侶越在天子鄣  
白岳奉玄君黃庭扈軒皇離宮三十六一一青蓮張  
我欲從之游跨石鞭神羊桃源幽且深黃鳥鳴梯楊  
入戶把綈袍開軒坐匡牀傳書介七聖明發叩天閭  
霞城五夜開羽衛嚴宮牆相從群帝入迭進萬年觴  
天顏粲一咲伊昔脩文郎東壁故圖書熒熒待張皇  
分庭命五老列館都文昌左拍浮丘肩右擎玉女漿  
贈之九節杖侑以雙明璫揮手掀牛斗放歌來鳳凰

滄洲閒無人東顧重徬徨宇宙何寥廓齊州天一方  
誰云混沌死海日生扶桑

送胡元瑞

咸池春水生五谿何瀾瀾朝發新安江暮宿江之汜  
君乘木蘭舟吾亦銜其尾潮上雷鼓聲雪山當面起  
辟易疇能從夷猶吾且艤望望海門開君行忽已駛  
一席信所之六鰲爭轉徙宛在滄浪天扶搖九萬里  
明河亘東西暘谷距濛汜四極簸天風日月如旋蟻  
魚龍萬國分水族何勝紀貝闕水晶宮鱗鱗互相比  
馮夷雜天吳鼓鬣紛旖旎鮫人明月珠萬壑矜填委

矯矯珊瑚枝交加羅海底微茫歷十洲結蜃開千雉  
員嶠若方壺蓬萊瞻具美羣仙十二樓羽衣臨結綺  
尾間一括通天步不容跬回首越江潯蹇予留一葦  
題家比部購遊仙圖古詩二章爲董太公四月  
八日初度作

羽人翔八極奄忽厲丹丘孤鶴從東下天風何颼颼  
喬松二千尺蜿蜒雙青虬空谷聞履聲伊誰躡遠遊  
安期與羨門結臂竝相求要之陟天都因之覲垂旒  
蟠桃以爲核麟脯以爲羞極祗與之俱一登玄扈樓  
築城旋七聖特室朝諸侯其下奏鈞天群仙紛獻酬



容成顧我笑七日已千秋俯視人間世晨昏任鶴鷄  
何如餐沆瀣枕籍醉滄洲

其二

纂纂安期棗大如青門瓜沃丹射朝日掩彼赤城霞  
若木標暘谷羨門擷其華願言餉夫君一餌生無涯  
西極有金仙其名曰釋迦言言舍衛城粲粲法雲遮  
孟夏月初弦獨尊降摩耶是爲天人師高載白牛車  
太上爲弟子三周繞結跏仙曹五百衆礫礫恒河沙  
逝將依祇樹竝作陀利花菩提同證果無用問黃芽

贈張祭酒南榮

留侯天授漢倬爲帝者師從遊赤松子辟穀竟何之  
高時千丈山軒然託具茨薄言輕脫屣委蛇復在茲  
歷歷緣川谷縣縣布本支盤根踞終古奕葉發華滋  
四塞以爲固斧斤安所施

其二

雍州都四塞甲第許與張赤縣互相望高陽與武陽  
東門大岳胤相府何煌煌黃石閼神臯千秋畏壘穰  
丈人事周游舉室居大梁所志在弧矢儵忽挂扶桑  
顧命六尺孤新都天一方中原懸四極信美非吾鄉  
戢翼將圖南勉旃慎勿忘

其三

有美當門子  
煢煢結髮初  
下帷讀父書  
挾策對公車  
待詔金馬門  
握衣承明廬  
遺言猶在耳  
豈不懷丘墟  
辨色入供奉  
當軒注起居  
長楊誇羽獵  
載筆扈乘輿  
三顧天子都  
兩端復躊躇  
誰其借扶搖  
九萬信吾如

其四

兩都天下士  
北面大司成  
吾道宗函丈  
斯文賴主盟  
臨雍留天仗  
命席當兩楹  
師禮迥自尊  
猥云稽古榮  
相君起鄉閭  
鼓篋一先鳴  
夫子分鴈行  
鑾和應同聲  
橋門亘南北  
出入如踐更  
一飲咸池水  
雙飛凌太清

胡然下德輝南極當文明

其五

朝發新亭下暮投滁水陽  
簡書寧不畏咫尺近柴桑  
况復當流火安車脂未遑  
一壺渡采石雙轂歷羊腸  
望望北斗城皇皇歸舊疆  
下車入州里觀者如堵牆  
駢首喜相告九苞廻鳳凰  
豈無衣繡行晝日覩重光

其六

朝光出暘谷風起雲飛揚  
擊楫渡南浦宗公及秋嘗  
草露省封樹茅沙脩裸將  
登臺當首餽酌醴且封羊  
白嶽禮玄君清齊嚴太常  
君親恩罔極並祝壽無

疆里社布衣飲經旬樂未央  
巡簷問風土百二輩金  
湯歲事五不稔灌輸無流亡  
巢由自箕頽稷契自陶  
唐一劃滄浪天直北任翱翔  
我無晨風翼步啄足稻  
梁

七言古詩

七夕行

天孫婀娜錦衣裳結好夫君  
河漢旁握手盟言夜未央  
有如逝水無相忘大道青樓  
多女郎紛紛薦綺羅  
椒漿願施膏沐傾朝陽聲價  
十倍邯鄲倡誰叩天關  
慙上皇盤空霹靂侵人床  
女郎辟易多彷徨河漢冥

冥不可望盧家少婦習流黃夫壻遠戍甘糟糠孤燭  
煌煌照洞房何用鄰女分餘光

天都行送江方伯入滇

境內天都擁帝封晴雲高插青夫容與君樞衣躡其  
上左右軒轅扈六龍行行上出飛鳥背丹梯可望不  
可從吹笙鼓瑟誰氏子天風吹落雲門峯谷口陰陰  
暑氣薄使君掉臂辭丹壑秋來結束萬里行路入西  
南開廣莫昆明池上漢旌旗太華峯前夷部落高視  
要窮天地奇長驅豈被簪裾縛君家彩筆向來工江  
左機雲未許同壯歲蚤通金馬籍周遊籍籍古人風

兩都浪跡仙郎署二郡升中太乙宮五老追隨彭蠡  
上三山鼓動滄溟東只今銀印已懸肘更喜竒遊落  
君手褰帷別是一山川形勝於君無不有壯君行飲  
君酒男兒所志在桑蓬咫尺安能依部婁漢家天子  
重詞臣使者相如藝絕倫此去秋風蘇肺病停車好  
過碧雞神

坐上放歌

主人好客擅風流坐客無如陳太丘十年著書東大  
樓提封萬戶醉鄉侯翩翩長君百不憂狂歌睚眦酒  
壚頭次君瀟灑黑貂裘郭隗臺前竟晚收過都歷塊

見驂騑王郎岸幘枕糟丘停杯復作華胥遊松子琵琶勝莫愁紫槽鐵撥古梁州分明胡語揚清謳滿堂賓客皆回頭胡生歌管夜悠悠一曲鳴琴落葉秋誰其滑稽程伯休當筵調笑暝雙眸昆也杖策來西游相逢腰下脫吳鉤主人殷勤進酒籌鷄號東隣片月浮欲去不去爲君留

少歌

有小序

兩甥既倍母氏義不得歌即託少歌義不得爲壽乃今爲舅也壽則亦爲舅也歌舅在猶母在也伯倡仲和誠無樂于埴簞取張衡而



半之亦少歌之義云耳

一歌曰我所思兮在北堂樹萱堂上及秋霜棣萼韓  
韓隣都房仙翁被我白霓裳何以報之雲漢章願結  
九苞駟鳳凰玄都延佇餐金光

右長甥

二歌曰我所思兮在渭陽秦州東逝沃扶桑蟠桃累  
纍遙相望仙翁晞髮白雲鄉何以灌之瑤池觴願援  
北斗引天潢顛毛九伐凋三光

右次甥

七襄詩

有序

上元年吾親若叔父並春秋老矣獻歲吾親  
始受三命道昆越在行間執政恤使者之

不遑且多其親之偕老也紀諸惇史紹介以  
歸吾親東吳王生脩二姓昆弟之義並以名  
言來貺王氏方用論著顯其言足徵近若鄉  
閭學士大夫遠若四方諸侯王賓客載在簡  
牘無慮數千萬言美哉煌煌乎舉足以當親  
心而施後世即道昆無能爲養尚亦有賴焉  
比及仲春爲叔父初度諸自遠近至者宜無  
異于高堂不識諸家凡若干言誰其先鳴者  
道昆自分菲薄不嫻于辭安敢望國老之穆  
清吳兩生之鉅麗也藉使幸而在側得當諸

子鴈行執爵陳詞又將焉避乃今三壽具在  
即羈鞅掌何敢無辭吾鄉山水隩區多列仙  
之跡雅有岡陵松柏祝者稱焉游子思故鄉  
千里不違咫尺以此爲祝誰曰不宜自昔枚  
叔張衡並稱作者概諸嘉祥善事猶可觸類  
而通用是取數枚叔而取義張衡誠知不讎  
直優孟抵掌耳老萊子爲嬰兒戲祇取承歡  
禮曰父黨無容皆是物也屬諸弟遞爲叔父  
壽遞升歌而酌之

其一曰我所居兮在大鄣上出青天雲雨藏逝將歸

去滯明光主人云是鏗與錢誰其從之有倥傯願驂  
鸞鶴雲翩翩千秋萬歲相周旋

其二曰我所居兮在天都上有咸池丹鳳雛逝將歸  
去我馬瘠主人云是浮丘翁誰其與之容成從願生  
羽翼乘天風千秋萬歲遊鴻濛

其三曰我所居兮白嶽巔上有丹梯千仞懸逝將歸  
去繫張騫主人云是雲中君誰其承之朝百靈願紆  
長劍當玄冥千秋萬歲蒼生寧

其四曰我所居兮在城陽上有真人不死鄉逝將歸  
去河無梁主人云是南極星誰其應之許宣平暮歸

酤酒朝負薪千秋萬歲離風塵

其五曰我所居兮在碧山流水濺濺繁考槃逝將歸  
去車間關主人云是蒙莊周誰其慕之謫仙流願御  
六氣覽九州千秋萬歲采真游

其六曰我所居兮在南陔上有林木千乘材逝將歸  
去立徘徊主人云是東王公誰其參之松喬同願食  
沆瀣青芙蓉千秋萬歲九成宮

其七曰我所思兮在漸江白石粼粼清且長逝將歸  
去闢扶桑主人云是安期生誰其偕之董雙成願升  
若木觀蓬瀛千秋萬歲滄海平

周公瑕爲徐使君畫蘭歌

作者誰當絕代無蘭亭書法朝川圖擅場耐可傾千  
古照乘那堪命兩塗近代吳興趙孟頫左臂搴旗右  
伐鼓長驅絕塞任縱橫肯許偏師當部伍我朝能  
事屬東吳碧浪蕪天蹴五湖祝允明書沈周畫一夫  
樹羽一援桴專門只數兩君子合璧唯應文太史大  
耄爭誇身手強吳興之後無如此速肖先亡彭孔嘉  
升堂入室周公瑕蘼蘼腐毫連作塚英英絲筆旋生  
花新都太守南宮客上計更前宣室席綠髭剛登三  
十年黃金首賜二千石故人忽枉青門東把臂猶疑

燕市中回首木蘭陂上路披襟好爲招雄風寫生工  
拙吾何有自負同心君信否裂繒雪色照雙髦環襲  
薰風扶兩肘暑雨須臾急大鄣瀟湘倒挂群龍翔三  
閭恍遇天都上九畹潛移練水傍熒熒碧石埋雲起  
曄曄紫芝紛可喜澤畔真從澹蕩浮毫端不用丹青  
滓雲土由來帝子鄉夔龍宿昔尚書郎夢遊好在金  
華省召對還携大國香蕭艾盈盈充結珮何如持此  
奉君王楚宮石室寧須數尼父鳴琴正未央君不見  
江關昨夜秋風入客子絺衣芳澤襲他年墜露許同  
食繁華爲君留食邑

# 春雨歎

憶昔場中結少年春遊跋扈東風前緣堤新柳張步  
障繞郭晴川出畫船三年泣血空皮骨向來狂態今  
孱然一春準擬恣歡賞九陌相將拚醉眠江北江南  
天漠漠社前社後雨綿綿應門稍喜少車轍執爨恰  
愁低突烟苜蓿飽撐檣下馬青蚨牢拄杖頭錢經旬  
泥潦舊雨斷滿壁蝸涎新雨連欹枕苦牽蠻觸夢閉  
關且學辟支禪山樓薄暮開返照版屋崇朝入漏天  
聞說軒皇怒不發誰干嶽帝竊其權雨師無端沉后  
土日御底事匿虞淵二麥霑泥爛欲死百花無處不



可憐愁聞斗粟價騰踊況乃近市爭喧闐爲叱群龍  
太放顛試看劒氣白虹懸亟須夾日扶桑上慎勿傷  
我種瓜田

長歌送無學歸攝山

少林心印不摹文曹溪法眼不識字智永懷素身手  
強臨池往往誇能事近者袈裟襲縉紳翻從點畫闔  
心神江東競學祝希哲白下爭傳徐子仁苾芻習此  
何爲者貝葉琅函都且雅清齋那愛右軍驚神駿絕  
勝支郎馬上人擔笈攝山來大士懸弧法界開春色  
摠歸苴子雨經聲忽度雨花臺有時偏袒右露肘落

筆縱橫大如斗聖教碑文儼若新魯公書法無不有  
書罷端居會法堂高譚大藏聲琅琅懸河直赴華嚴  
海携手同登般若航傳道汝師持苦行西來一錫起  
襄陽日中千衆分僧飯霞上多年坐道場汝出佛家  
根大利聞言即悟西來意多聞久已入圓通三昧猶  
堪恣遊戲伊余不慧復尔狂曾持白梃擊空王亟須  
滅此小兒口十方三界盡平康摧倒須彌山塞斷菩  
提路驚殺雪山僧砍却祇園樹天上天下復誰尊指  
地指天非不住究竟何須具辯才聖凡一切毋回互  
於斯時也須令葛獠旋求蒼頡書達磨代作阿難務

但攝小乘歸上乘應知此悟爲真悟

予以歲杪及耆其日戊午質明肇郤舉子瞠乎  
吾後而肩隨之遂命小字肩吾爲歲星行以紀  
其事

鳳紀軒轅萬曆逾歲星十二周天衢南州比屋封唐  
虞申甫降神天子都先春三日君握珠又先一日我  
懸弧海鳥飛上新桃符廟門雙挿金僕姑當戶我呼  
頭白烏朝陽君翼丹山雛國士襁負貂檐褕歷階一  
見毛骨殊王孫冊名世系圖閭史載筆命肩吾嗟予  
短髮生頭顱結宇東林傍苾芻煌煌越國帶礪俱穠

秣那得爲前驅君家有子萬事須滄溟新出紫珊瑚  
堂上歌鐘堂下竿把酒爲君醉屠蘇

憶昔行端午紀事寄二仲

憶昔宮衣出 尚方題名司馬侍中郎歸來改服夫  
容裳玄扈樓中坐帝鄉支杖當年絕水漿迄今二豎  
不銷亡白頭高枕卧匡牀河朔那能競羽觴生事年  
來足稻粱鳴鳩雨歇麥登場往年水旱遍爲殃江北  
江南歲大傷擔石時聞發社倉比鄰猶自閉關梁淫  
淫春雨決宣房大麥離披小麥僵菜色鋪糜集道傍  
殍尸盈野澤爲量我家無復宿春糧八口那得饜糟

糠海日杲杲上扶桑薰風弄晴梅子黃仰天萬口呼  
滄浪願借遺甿倒景光潑水寧容估客航仍聞米價  
踊江湘水嬉不擬競端陽續命五絲那用長有弟有  
弟雙騰驤翩翩兩服當鴈行豐干結客恣清狂碣石  
談天誰頡頏一旦皈依大藥王三年楚楚廢循牆阿  
嘉差比阿淹強門徑蓬蒿雀網張三戶誰探大國香  
幽蘭宛在水中央漢濱游女凌風翔蕭艾紛紛充珮  
纓莫向江潭歌慨慷古來陳蔡俱郎當願言伏臘具  
烝嘗一任風塵老驢驢

七旅詩

有序

是歲鶉火中諸大父行汪次公始老期許初  
度公有事番陽客謂公擁素封胡爲乎急銚  
刀而後樽俎余小子否否公方以孝友亢吾  
宗所不足者非財何恡高會第考氏春秋累  
百同胞孟若季皆未終其天年以孝則思以  
友則慕冥冥有父兄在寧徇人羣而倍天親  
客曰不然明發有懷則期願無憾在原有急  
則諸子姓翩翩代興以是而概於中且永釋  
矣公惟親睦爲矻矻其餘則推之吾黨而波  
及之閨曰歸餘此天之所以贊報德者也吾

黨其以旅獻一紀一觴願司馬揚驥先之嘉  
祥善事舉矣竊惟高尚之士必遺世乃能振  
世必振世乃能出世求之古昔吾得七人公  
其徒也事親若老萊子從兄若季心息業若  
鴟夷化俗若庾桑楚檢身若遽伯玉難老若  
榮啓期久視若安期生庶幾乎近之矣旅以  
七獻侑以七襄則吾黨今日事也即余小子  
不敏敢不敬從

一旅曰若有人兮楚老萊班衣兒戲親顏開車幣臨  
門先鑿阨誰其從之有令妻烏粒聊以樂吾飢白首

相將海畔棲千秋萬歲和天倪

二旅曰若有人兮漢季心居然一諾千黃金高門懸  
簿士如林誰其從之五陵豪何以壽之斟松醪酒罷  
殷勤稅佩刀千秋萬歲樂以敖

三旅曰若有人兮陶朱公計然七策五成功餘力猶  
堪敵國雄誰其從之越夷光何以壽之楚瀝良錦製  
天孫雲爲裳千秋萬歲壽且康

四旅曰若有人兮號庚桑屏跡三年畏壘穰皞皞仕  
隣躋上皇誰其從之采真游何以壽之汗尊杯天地  
一指海一漚千秋萬歲相沈浮



五旅曰若有人兮遽大夫行年七十心始剗卷席懷  
珍猶故吾誰其友之魯仲尼何以好之侑坐移試酌  
之水正勿歌千秋萬歲堅自持

六旅曰若有人兮榮啓期行歌帶索任逶迤生年滿  
百常若斯誰其從之古老更何以壽之酌兕觥願言  
鼓腹享升平千秋萬歲樂農耕

七旅曰若有人兮安期生神遊八極棲蓬瀛棗下纂  
纂如瓜成誰其從之長羨門何以壽之登昆侖五嶽  
何如西北尊千秋萬歲歸長存

對雪爲長句贈辛公

歲杪河水堅入腹掀翻河伯魚鱗屈同雲不布雪陰  
陰三白九農那可卜江上扁舟雨後開君携白雪郢  
中來雙江峽口停征舸七里灘頭失釣臺篋中更理  
狐千腋城下俄看雪盈尺我作山陰訪戴行君爲坐  
上游梁客燭龍匿景竟沉冥粵犬吠聲連宿昔褊戴  
還應問酒壚泥塗未許乘游屐當年君手城旦書玉  
質英英雪不如要識易汚原皎皎從他不滓但徐徐  
君不見東郭先生曳敝履眼中無復夸毗子瓶無餘  
粟突無烟咲殺侏儒徒飽死又不見袁安僵卧古郵  
亭叩戶誰來問客星坐擊唾壺殊欲缺何妨按拍召

秦青蚩蚩白眼寧足齒睚眦千秋瞪萬里恍惚神遊  
白玉京與君同向貝闕銀宮聊徙倚我越吟君楚歌  
洞庭廣樂古無多試看春雪渾如夢杲杲羲和柰雪  
何

長耳歌爲黃生作

客有黃生及門士東林從我作佛事發心立地見如  
來翹首法門皈不二佛眼瞻此居士身十方龍象紛  
紛至移來西極化人居法界均沾甘露施里嫗昔何  
夢夢登君子堂儼然下天女纍纍雙明璫自陳前身  
事夫壻舊糟糠一涉功德海化身投故房願言主七

望百祀綿烝嘗佛前親受記兩耳垂肩長故態宛相  
似夫君幸勿忘黃生僅諾諾無乃涉荒唐有何諸父  
行即次子雲宅媿媿語黃生同夢亦同昔黃生大懼  
喜生平幾半百儻茲舉寧馨況出故巾幘各各夢相  
符金仙或來格無由報佛恩持戒依香積惟此菩提  
心長爲佛家役徧告諸比丘讚歎聲嘖嘖臘日佛成  
道沙門盡散歸齋心竟不改取給園中葵元日日出  
卯扶桑上褰闥定光俄出世長耳相因依上堂告翁  
媪翁病起欵扉媪矇復明視下牀授兒衣下堂告女  
弟喜氣充調饑出門告宗祏門祚生光輝疾馳告門

大國集 卷之二十一  
下佛力願無違誓首皈依天人師無遮大會功無上  
從誇天上石麒麟爭似西來真法相

古松歌

何物吳門老畫師白頭繁縟矜奇絕咫尺能生十丈  
松龍鱗錚錚黯如鐵半枯直幹排青雲四匝樛枝擎  
白雪未許人呼老禿翁蒙茸綠髮如椎結食邑吾家  
自岱宗當年或恐避秦封只今高峙雲門頂憑陵三  
十萬芙蓉

新都行贈別張太史

君不見三天子都高出雲下視雲天三萬里東南一

氣但鴻濛匡廬天目俱培壘右蹴彭蠡左具區微茫  
海色一杯水又不見黃帝南游赤水旋齊驅七聖奉  
群仙雲門雙劈巨靈斧亭亭三十六青蓮合宮俯矚  
寥天一白嶽峻嶒當戶出丹嶂中開帝子宮翠微半  
露真人室流水濺濺度碧山千盤五嶺百重關嶺南  
三洞真竒絕天鏤地肺非人間姑射神人何綽約矯  
如華表遼陽雀千章梁木芘丹丘中夜中天聞廣樂  
揚之水出華陽西流半界白雲鄉華陽城西石如鏡  
擁髻初臨玉女粧城陽列羣山一徑懸空谷何來謫  
仙人試聽采芝曲有時倚杖南山巔千峰萬壑秋可

憐玄扈坐中樓十二紫陽門下竇三千天都白龍潭  
十仞如環堵空明徹底清歷歷沙可數丞相源西別  
有天峰頭銀海天尺五九龍分據水晶宮九流噴薄  
鳴天鼓相彼百川水誰爲百谷王西距漸江流岑山  
宛在水中央五谿縈迴合南浦百里清淺倒天潢上  
有千歲松下有一拳石逶迤三百六十灘綰轂懸旒  
天半壁誰割玄黃無始前居然光嶽生名賢再世歸  
來虹井里新安自是好山川蹇余半生牛馬走東巡  
溟渤南峒巉三湘七澤溯真源嵩少云亭當馬首燕  
趙悲歌入酒徒扈從長楊營細柳野燒乘風燼幕南

旋馬陰山迴北斗歸朝一解鷗鷺裘疏入承明貸倦  
游函谷還堪占道氣武陵耐可纜漁舟桃花谿上曲  
楊柳市南頭黃鳥翩翩乘灌木友聲百轉如相求老  
夫家在千秋里村村花事正綢繆籃輿歲入里中社  
二三垂白風颼颼時作田家飲時從俠少謀有酒直  
須傾落日明朝或恐急鳴鳩閣道天門開清涼依上  
界坦腹卧巉巖洗心流沆瀣高天奄忽流火西明月  
盈盈鵲未棲放筏正逢牛女度登臺直待星河低天  
風木葉下白露草萋萋江村萬樹俱秋色片片流霞  
咫尺迷玉衡北指日苦短匡牀夜坐照青藜寒闌溫



室生虛白墻頭積雪過偏提時乘貫月槎爰自金閨  
彥十月故鄉游故人猶戀戀振衣閭闔風端笏明光  
殿太液與上林官車足游衍美芹信野人願作尚方  
膳

寶劒篇

有序

壬戌之秋元敬入閩三捷偕余目擊閩難不  
軟而盟則以良劒二分佩之所不徇閩者如  
此杖丙寅余釋閩事戊辰元敬入朝劒始合  
于虎林信宿而別壬申余奉使大閱再合劒  
門乙酉元敬謝南粵入新都三合于白榆社

乃今元敬已矣故劒不知其存亡余彈鋏長  
歌盖有感于延陵季子云爾

將軍乘勝奉專征橫海樓船下七閩行處饒歌朱鷺  
曲擎來鐵網蒼龍精風胡司鞬星辰落歐冶臨池鱗  
甲生湛如芙蓉出秋水燿如赤電起青萍于時先登  
殄水族鯨鯢流血天吳戮舊壘駢肩踞自如新航銜  
尾紛相逐孤軍耐可當兩隅大厦那堪支一木直須  
重起伏波軍誰爲七日包胥哭眼中國士但吾曹轉  
轂長驅同一輻盤水奉劒千金裝其一雄飛一雌伏  
寧須牛耳蒞齊盟各佩魚腸分比目白首經營誓不

渝我爲召虎君方叔蹇余辟易承下風我但守雌君  
當雄乞師再至無窮髮居然百勝奏膚公故侯既已  
東上將亦已北胥命越王臺相將六月息一飛直指  
蓬萊巔一望猶函滄海色單于犄角結鮮卑拊髀誰  
當神武師召見建章先自獻金城四塞願當之 帝  
曰惟汝諧殊材良不乏頗牧出禁中 主恩一何洽  
郭塞列金湯材官徵韎韐蚩蚩亶不聰任耳作眉睫  
乃命右司馬仍燕中執法代朕蒞行間周巡閱兵甲  
使者桓桓出薊門長楊細柳上朝暾三軍挾纊生春  
色千騎浮雲奉 至尊扶杜歌葡萄酒饗禮成功居

首坐君燕坐藉糴稊承景含光出坐隅疇昔有銘威  
四極今來南北與君俱謗篋啟中山戎軒踰大庾魚  
麗偃牂牁鷹揚緹申呂願乞侏儒枵腹歸敢希鴻鵠  
凌風舉籃輿千里入東林四望層樓近百尋城秋好  
共青天月閣夜同班綠樹陰揚眉並入廬山社彈鋏  
聊爲梁父吟斗牛之間仍二子滄桑未許摧雄心君  
孟諸我歎浦咫尺延津分水滸奄忽存亡何足數遺  
弓留舄俱千古誰能招魂爲我歌我欲拔劍爲君舞

寶劍篇代贈汪肇邵應試京兆

吾聞帝者軒轅氏鑄劍霞城之隩區乃命容成敦冶

風后聚徒液以刀圭之上劑輔以懸寓之洪鑪砥以  
雲門之斷石淬以左洞庭右彭蠡之重湖瑩以咸池  
之神漢珥以赤水之玄珠衡而置之三十六洞天  
之石室直而懸之七十二函丈之蓬壺于時涿鹿拔蚩  
尤誅合宮徙廣樂紆乘龍之帝所迴顧仍踟躕中夜  
時聞風雨泣空山或抱蛟龍呼後來殷帝三良出光  
景冥冥乍有無巨闕干將俱已矣短衣瞑目胡爲乎  
伊余五馬再分符郭外黃山西北隅喬喬乎浮雲垂  
天延郡閣寥寥乎大塊噫氣吼風胡野人往往見光  
恠掘地得此騰驪虞願言獻之二千石願言償之十

五都土花黹黹星文蝕雲漢昭回斗氣孤出柙已辨  
蒼龍精扶桑初日上金鋪誰其服之櫻負隅鬼伯辟  
易神姦逋 太平天子正神武材官百萬罷張弧大  
海之南築京觀殪天吳大漠之北遷老上款匈奴驪  
裹千金肥苜蓿車書萬里捧輿圖汪生束髮章甫儒  
俠氣翩翩烈丈夫五陵豪士惜然諾肯呼五白甘櫟  
蒲只今挾策趨內史煜如青海出珊瑚吾將佩尔玉  
韞韞命中賢千金僕姑君不見洛陽年少當前席抗  
言三表收胡雛又不見弱冠終軍投魏闕請纓塞外  
繫單于馬赭白蹄偏朱秣陵官道通燕市說劒勿與

太函集

卷之一百八

三十一

酒人俱

太函集卷之一百八

太函集卷之一百九

新都汪道昆伯玉著

五言律詩一百四十七首

芋原入舟鄭叔曉自莆陽見過席上有贈

避世成真隱從軍作遠遊人生惟聚散吾道任沉浮  
列籍開戎幕維舟近戍樓願言俱酩酊聊以結綢繆

其二

不見故人久其如羣盜何軒車來驛路鼓角動關河  
說劍功名薄當杯意氣多百年徒物役五夜此悲歌

其三



汲鄭名猶盛應劉侶漸稀多君辭宦達而我受戎機  
歲月交情見風塵樂事違滄洲今不遠携手爾同歸

其四

畏塗經百戰烽火照孤征爲惜十年別寧辭千里行  
驚心聞野哭把臂待鷄鳴海內無推轂天南勿請纓

席上呈余使君

爲別昔何處相逢今在茲長安論舊事大雅見新詩  
朝市浮雲變琴尊白日移宦游憐汝在吏隱信吾師

其二

執法唯三尺提封亦一方官曹吾碌碌王事爾皇皇

比屋鼠化虎連城狼牧羊翻思潛漢署何意薄馮郎  
其三

客散五陵去君從三殿來乾坤同逆旅江海失群材  
白雪郢中曲黃金薊北臺所思俱汨沒相對且遲迴  
其四

流離知更異感激許誰同吾黨形骸外人生涕淚中  
身危思伐木官拙任飄蓬莫作窮途哭知君劒術雄  
七月六日自軍中還省宿大田驛時復有福寧  
之師

野哭仍聞戰饒歌亦暫歸秋風入刁斗涼月上絺衣

終孺心猶壯龐公願已違無勞望牛女況復事戎機  
試新茶

消渴蠲吾疾清芬待爾功無才評陸羽有癖過盧仝  
但得萌芽異何須製作工當鑪聊自試習習欲凌風  
花下獨酌得尊字

南國春風盡西園花事繁後時知不競向日似能言  
飛白臨書卷舒紅照酒尊主人甘寂寞暮雀勿爲喧  
又得和字

竹使經年客花神此日過愁邊聊爛熳醉後故婆娑  
色豈六宮妬香疑百和多憑誰徵素女一曲奏雲和

院中九月桃花

孤亭依桂樹九月見桃花白眼繁春事紅顏逼歲華  
香疑蟬外露色借鷺邊霞避世甘浮海尋源好問家  
其二

豈謂青陽令還從白帝移災祥吾未卜早晚爾何知  
幕府羈棲久樓船戰勝遲故來征鴈候應與放牛期  
漳州院中桂花

炎海愆花信高秋著桂叢衆芳蕭瑟後獨秀草亭中  
泣露金莖似飛霜玉樹同明朝復長路開落任天風  
春雨玉臺道中

擁塞春全暖間關雨亦宜薄寒還衣袷遠道自褰帷  
行色青山入羈心碧艸知江流時正滿舟楫晚堪移  
夜泊吉溪

急雨暮江鳴長年未可行春燈來野色宵柝起邊聲  
風浪垂堂戒關河擊楫情升沉俱物役進退信浮生  
送仲嘉入越讀書

不惜征人遠其如歲事深問津鴻鴈候把酒鶴鴒心  
白雪應相憶丹書好自尋扁舟下春水吾興亦山陰  
喜詹山人至

衡門空谷裏落日故人來歲事餘冰雪時名失草萊

青山招隱賦白社出羣材此地堪乘興扁舟未擬迴  
送詹山人還里中

菟裘吾欲老畏壘爾相依海內窮交在山中俗事稀  
雪殘梅欲放日暮鳥知歸明到滄江上遙天識少微  
冬日山村十首

風壤近炎方人煙此故鄉褰帷蓬戶靜抱几竹書光  
客至拈鸚鵡囊空貫鸛鷀勿云催短景坦腹日猶長  
其二

世路妨推轂君恩重賜環歸來吾事畢老去此身閒  
初日從高卧明霞足駐顏翻思宵柝起雨雪滿關

山

其三

雪後羣峰出天南一鴈過黃塵殊未已滄海近如何  
國士無樗里邊人有伏波因君懷夙昔吾道本巖阿

其四

憶昔從司馬長楊較射熊羆旌千騎出天網四隅空  
文豈相如似時應漢主同只今飛鳥盡好爲羈良弓

其五

去矣青雲士居然白雪音吏情俱道路吾黨遂山林  
人阻三江暮書藏五岳深春來理舟楫乘興一相尋

其六

漢家封大岳冬至事祈年下吏陪仙仗中天捧御筵  
雲霞羣帝駐日月五城懸何處迷蒼狗遙遙積翠邊  
其七

放達山公後高陽憶酒徒臂鷹乘積雪立馬問當壚  
吏跡留三楚生涯落五湖已知時論異未擬著潛夫  
其八

舊業依脩竹居人耐歲寒清齋麾肉食白幘舛皮冠  
習靜慵招客迹名喜罷官儼然來鳳鳥聊爲試琅玕  
其九



野客青藜杖田家白板扉偶逢百日蜡况是十年歸  
痛飲忘賓主深談任是非不妨歸路晚一醉臥牛衣  
其十

不問中人產依然處士家相將憑棣萼次第看梅花  
雪色知無負春華信有涯綈袍寒漸薄箕坐待栖鴉  
戚將軍鑄良劍二謁子銘之托以久要遂分其  
一省署火故物悉亡獸舍中兒抱劍出火中賴  
得脫歸示家弟相與幸其有靈爲之彈鋏而歌  
作詩三首

國士投知己分懸比太阿星文開瘴海夜色倒明河

決勝千人廢論功百戰多神姦空睥睨天意豈蹉跎

其二

海上留楊僕人間到祝融憑陵羣醜盡呵護萬靈同  
氣振艱危後天廻指顧中蛟龍盤故櫝動地起悲風

其三

東國人言至延津客路長一辭多壘地更入少年場  
斗外千秋色牀頭百步光自知非俠骨寧復事戎行  
十五弟歸自武林有作

頃耽高臥單車罷遠征掉頭衰髮在握手壯心驚  
綵筆堪從事青門好避名寒空飛鳥下似識倦游情

同弟守歲分韻得今字

一尊殘臘夜十載倦游心故國還兄弟流年自古今  
狂堪千日醉老任二毛侵况復無朝謁何妨秉燭深  
又得宵字

物色催遲莫年華傷寂寥掉頭俄隔歲抵掌判今宵  
花萼光堪把扶桑望不遙尔曹猶躑躅吾計已漁樵  
元日

一辭滄海日重見故園春絲筆才堪老板盤賞更新  
世情踈傲吏風物媚歸人溪水雙鷗至呼兒理釣緇  
慧公閱藏金陵住棲霞寺頃歸鄉縣營聖僧菴

鄉人築室奉公蓋旬月矣余家食不通賓客公  
獨時時從仲房來茲還棲霞贈詩一首

布金開佛土杖錫到人間累月三生石孤雲萬里山  
浮沉心不染去住意俱閑我亦許詢輩風塵且閉關  
荅余德甫

南紀無歸橐中山有謫書交情懸斥堠生事寄菑畬  
削迹成真隱題詩問索居天涯占氣色夜夜斗牛墟  
其二

羣材俱跋扈聖世但沉淪命達非文事名高自古人  
門從蟬冕少家任鵷冠貧澤國多芳草春風倚逐臣

春日同王仲房及舍弟遊聖僧菴因止宿

乘春遊汗漫結客赴招提高坐人天上深談佛日西  
雙林出祇樹一水下曹溪忽爾經聲起依然衆鳥棲  
其二

野色互明滅烟光乍有無望中開水月坐上入江湖  
隱几浮生失傳燈靜夜徂祇應從長者築舍徧毘盧  
沙門道隆閣藏仁義寺徧謁溪南諸長者爲之  
聚糧余故習吳長公因以詩請

一鉢依檀樾三車聚苾芻高門季子喬精舍遠公徒  
飯擬供香積園應借給孤他時雙樹下聽法許潛夫

大將軍生子

婉婉當門子遙遙降嶽來  
高秋芳玉樹大海出珠胎  
許國山河誓承家驃騎才  
傳貂應計日掉臂入蓬萊

其二

萬事從今足孤忠自昔殊  
主恩酬馬革天意產龍駒  
載橐歸何得趨庭立可須  
懸知王事急不擬問呱呱

春日仲房見過

林卧入春深君來聽鳥音  
拂衣今日事投轄古人心  
白幘容分席清醑任賜金  
不辭侵草色聊復藉松陰

其二

門巷無車轍乾坤有布衣東陵生事拙南國和人稀  
斗酒留看竹盤飧出采薇前溪問蘭若落日送將歸  
春日山村十二首

嚴更通五夜列炬照千門金馬仙郎籍銅龍國士恩  
仰天違畫省對月理清尊社鼓春歌起篝燈夜出村  
其二

耕稼餘生事機祥太史書春來望雲物老去傷田廬  
抱犢柴荆外聽鶯楊柳初漸於農務習轉覺世情疎  
其三

白首甘爲國蒼頭課灌園  
荷鋤通暗水倚杖俯晴軒  
池近鷗相狎村深鳥自言  
烹葵足留客車馬不聞喧  
其四

官車問陵寢哀詔到巖阿  
地遠傷心劇天高入淚多  
鼎湖還日月京洛自山河  
憶昨從村社猶聞擊壤歌  
其五

中興初嗣服北極正垂衣  
曆數天王紀謳歌帝子歸  
萬方同鼓舞七廟倍光輝  
迢遞瞻佳氣氤氳護紫微  
其六

小隱學岩居長安到驛書  
黑頭開相府白面對公車



俎豆分泉室，弓旌下草廬。巢由何所避，箕穎未應虛。  
其七

芳蘭何寂寞，空谷自招尋。踪跡三湘遠，風光九畹深。  
無人同結佩，有客獨沾襟。世俗饒蕭艾，吾生信陸沉。  
其八

依依方丈室，坐對蔚藍天。定後窺三昧，空中覽四禪。  
焚香隣舍共，擊磬石堂偏。賸有青精飯，齋心繡佛前。  
其九

端居逢上巳，緩步出東林。列籍巖花積，開尊野水深。  
詞人無異代，禊事有同心。但盡山陰興，寧須澤畔吟。

其十

醉歸夜未艾睡起日高春屏跡孤村遠忘機萬事慵  
簷花飛冉冉巢燕語喁喁種秫供吾臘從容問老農  
其十一

旅食驅吾弟齋居謝友生獨憐春事過翻憶少年行  
童僕供孤酌妻孥計耦耕窮愁吾自遣慎勿效虞卿  
其十二

林卧盡三春鶯歌動四鄰登臨餘宿昔代謝任逡巡  
物色還游子時名避散人盈盈漸江水吾意老垂綸  
送顧季狂入閩兼訊戚都護吳太守

懸車今故里彈鋏復災方不獨戎機息其如客興長  
薰風迎杖屨暑雨限河梁遠道誰知己投人慎夜光

其二

將帥專征任勲名百戰收腐儒歸白社甲士散清秋  
天地愁孤立風塵作遠遊燕然猶未勒去去莫淹留

其三

汲黯官仍拙淮陽卧自堅名高焚草後頭白積薪前  
問字經炎海題書寄遠天五湖堪卜宅一繫剡谿船

吳中有客過訪

故人憐契闊此日見交情白社盟猶在玄經草未成

空齋無長物高枕有餘生  
好去驅黃犢春來計耦耕

仲房種樹潭園

舊業清江上新營嘉樹林  
柴荆三畝宅松竹百年心  
生意先春入蟠根耐雪侵  
遙知門徑改五柳欲成陰

仲魚執雉入山

著作千秋事風流一代同  
時名終畫虎吾道豈雕蟲  
几杖青門下衣冠白眼中  
比來辭問字寂寞勝揚雄

雪

故園冬全煖殘年雪正飛  
關心占稼穡縱目領芳菲  
萬樹先春發孤村入暝微  
明朝潭上好乘興到漁磯

焦山

初地徵書在中流法界開江山猶古廟花柳自春臺  
渡口潮聲上墻頭海色來清齋分苜蓿極目望蓬萊  
將簇焦山喜有定原柏鄭甫至

我問三江路客來雙樹林人間難去住方外易浮沈  
緩步滄洲近高譚白日深還應耽說法試聽海潮音  
月下呈諸君子

孤舟仍未去五夜更誰同把臂江天上觀身水月中  
尼珠分色界佛土入虛空已悟無生法明朝謝遠公  
喜聞民璞解官四首

殊方王事重晚節主恩深不惜丹心盡其如白髮侵  
拂衣辭道路脫屣向山林邈矣幽棲處居然似漢陰

其二

國士何勝數聲名爾獨完車懸輕博望疏入重長安  
夜氣雙龍劍春風一鶚冠江天回首處今作少微看

其三

老去逼時名歸來避世情壯心從髮短衰疾得身輕  
天地迴金馬風雲過石鯨漢京陪羽獵若個賦昆明

其四

不緣求大藥那得遂初衣官豈文園廢人應栗里歸

江鷗隣草閣野雀網柴扉莫問殘生事南山足采薇  
五月一日過靈隱寺叩岫嶠山房

空林懸赤日夏木隱丹丘地接清涼界天容汗漫遊  
落花迷洞口流水過牆頭擾擾人間世仙源儻可留  
十五弟自製籜冠寄我湖上作詩答之

愛弟題書遠羈人辟暑難飛來松頂雀爲寄竹皮冠  
岸幘秋先入抽簪夜欲寒伊余甘白首騰見爾登壇  
其二

鹿園君復去鷺嶺我初歸色相無拘礙聲聞有是非  
祇應留法在或恐悟人稀相過河梁上寒空鳥倦飛

賦得東閣梅

初日當樓啓寒花入座春風烟分綽約冰雪闌嶙峋  
澤畔心逾潔江南氣已新揚州搖落後乘興更何人  
雨後項梁甫入山問詩

君來乘間道山雨在綈袍中歲心逾壯陽春調轉高  
人家依谷口客飯共溪毛何事啼鶯切同聲得尔曹  
贈梁甫

尚方多櫪馬故里獨鹽車玩世從儒業逢人問子虛  
風塵生短髮市井失長裾贈爾烏皮几殘年好著書  
沈明府過舍同吳虎臣



褰帷來沈約分席復吳均  
徑草埋雙轂檐花絕四隣  
林泉餘樂事杯酒盡詞人  
秣馬青芻在山家未是負  
其二

茂宰新華髮潛夫舊草堂  
身從三徑老客到四明狂  
霜露歲云暮星河夜未央  
南鄰堪取醉乘興出柴桑  
寄沈明府

豈謂文章伯還堪州縣勞  
歌聲聞比屋交態見吾曹  
夏木千章迴春城八詠高  
初衣足薜蘿不必問綈袍  
其二

之子妙爲政孤城保障哉  
碧山蕪吏隱赤縣爾仙才

隴麥經時秀巖花到處開朝天應咫尺飛鳥卽蓬萊  
宿孫氏竹沙草堂

落木清江上陰陰水竹居晴光留戶牖夜色潤琴書  
萬事惟高枕三秋此駐車平生疎客禮天地亦吾廬

其二

爲問家人產何如在渭川漁竿依石瀨客舍入江天  
水落秋無盡林深夜可憐晨炊吾欲蕨迢遞問人煙  
雨中喜陳丈人至

江上黃梅雨人間綠髮翁衝泥尋舊侶把臂入新豐  
然諾千秋重風流一代同扁舟待明發挂席正乘風

山居暑雨作寒憶吳二

病臥千峰閣寒侵五月裘雨聲紛入夜天氣颯如秋  
鷗鳥翻歸宿蛟龍喜出游幾時迺赤日此地問滄洲  
問虎臣新居四首

莫問千金產猶堪四壁居祇應迺市井幸不廢琴書  
徧性愚公谷窮交長者車移來五楊柳青葢迺何如  
其二

未就桃源隱還從桂樹招民風依蟋蟀吾計得鷓鴣  
斷石紫村徑迴塘度野橋浮生無住著得地即逍遙  
其三

卜居芳杜曲不愛鬱金堂  
澗道浮秋水江皋散夕陽  
閉門玄作草結客醉爲鄉  
莫漫來車馬行歌一楚狂  
其四

小築何遷次移居似稚川  
家人驅鶴駕山鬼負龍淵  
井上燒丹竈牆頭種玉田  
秋來明月好占盡白雲天  
雨中襍詩

祇應星好雨忽漫雨經時  
前月黃梅熟中庭碧蘚滋  
不妨疎過客或恐害農師  
極樂吾何得清涼信有之  
其一

爲愛連山雨都無滌暑侵  
樓居猶衣袷風至獨披襟

人代唯樗散神州豈陸沈何時邀白日晞髮坐東林

其三

山雨夜如何沙頭新水多篝燈凌極浦舉網集盤渦  
地險依孤樹江寒擁一蓑不愁隣虎穴試聽起漁歌

其四

群嶂高無地孤村小有天舉家乘水潦荷笠種山田  
幸及寬租詔還餘取酒錢歸來飯牛罷同醉瓦盆邊

其五

雨過荒村曙雲深夏木稠出門泥活活隔岸鹿呦呦  
久客如相識長林得自由虞羅徒側目莫向夢中求

荅仲嘉問疾

老去堪多病書來問二毛披衣當暑雨拂枕傍江臯  
曲折仙源接炎蒸客里迯雄飛看汝輩高卧任吾曹  
硤中寄仲嘉

我投雲水曲爾住酒壚傷懶性從愚谷窮愁問醉鄉  
索居經積雨何日賦長楊莫謂潘郎少秋風鬢易蒼  
秋夜宿忬公房

明月經行處高風竹樹林祇應忘去住況不廢登臨  
香氣三天近鍾聲五夜深床頭寒已厲疑在雪山陰  
雪夜有懷沈嘉則吳虎臣胤上人及二仲

地偏踈客禮歲晚得吾曹賦豈梁園重名應郢曲高  
千秋懸絲筆五夜憶綈袍只尺山陰道相過肯憚勞

其二

一室初遷次何人獨往還柴荆留上客風雪滿前山  
夜醉仍呼酒天寒且閉關平生惟俠骨明發去人間

其二

雪暗曹谿路花明祇樹林四天空法眼十地淨禪心  
何處來飛錫居人擬布金瞿曇應不遠高坐白雲深

其四

今夕江村雪無如野寺寒祇憐吾弟在莫遣客衣單

白社年俱盛青燈夜欲闌謝家多賦客何日獻長安  
雪中荅嘉則

好在滄洲客其如白雪何高樓天畔眼長缺醉中歌  
雲樹緣江盡風花帶雨多仍聞呼酒伴隔水問漁蓑

荅虎臣

至後連山雪行邊萬里裝祇應浮大白何處醉高陽  
坐上題鸚鵡壚頭解鸛鵒江天蓬戶閉獨夜竹書光  
送張平叔還四明

到來唯白社歸去更滄洲雨雪高吾卧風塵倦爾游  
天寒彭澤里地坼漸江流耆舊如相問蕭蕭一敝裘



其二

久客交游冷多君意氣存屢廻支遁馬不問孟嘗門  
長路永花澀空江霧樹昏觀身忘去住掉臂任乾坤  
正月八日登舍後山即事

卜歲宜今日登山出近隣松筠容我老雲物向人新  
祈穀村村社探梅處處春交游知漸冷童稚故相親  
采蘭

何物幽人佩唯應王者香春風先九畹物色破三湘  
采采空山曲行行大澤傍三閭倘然遇作意勿忘裳  
宿程氏松溪草堂

當年留客處籍甚丈人行七寶王孫騎千金俠少場  
路傍封馬鬣身後見龍驤不用雍門瑟秋風泣孟嘗

其二

避世從吾好通家傍汝來初筵辭客禮故國引仙才  
黃石扁舟繫青門別業開居人占夜色星聚漸江臺  
過仲房不遇

青鳥三山下滄江一棹移祇從燕市飲竟失鹿門期  
叩戶尋丹竈題詩就墨池灌園溪上路到處草離離  
海陽別弟

青雲初獻賦白首復彈冠兄弟翻飛異君親去住難

吞聲悲獨往執手勸加餐不是輕雙淚其如薄一官

江上憶弟時八月九日有事文場二首

漢上停江舸天南望澤宮遙憐諸弟在各負萬夫雄  
許國堪今日承家自古風亦知文已似誰爲薦河東  
其二

聖代徵多士吾家起大名但從人貴我寧避弟難兄  
何日封書至他鄉解印行輜川方丈室庶已足浮生

獨酌憶虎臣

時虎臣在楚

山簡仍官守荆軻自客居世情幾失汝使氣尚憐予  
獨酌停杯酒相思寄尺書紛紛徒短褐作意莫長裾

過觀音巖

泥塗亦已苦淨土若爲開石傍林中起泉從石上來  
空庭無洒掃落日有徘徊回首雲山外祇園安在哉  
寄豐干社諸君子

吾家豐水上秋色繡林臯衰病從王事窮交憶尔曹  
青雲仍偃蹇白社未蕭騷籬下留叢菊猶堪傷濁醪  
省中懷海陽游好

隱几聞黃鳥嚶嚶漢署春吏情方朔戟客思季鷹尊  
鄉國殊佳麗心知自隱淪芳亭修禊事應憶倦游人  
北游別社中諸友四首

執手東郊道高雲照客杯浮名牽下吏真隱羨羣材  
白雪荆南客黃金薊北臺商山求羽翼早晚鶴書來  
其二

主恩從結髮時難豈藏身杖策趨京邑停車謝故人  
燕歌多意氣周道少交親千里南流景同心在比隣  
其三

漢家方用武何用曳長裾四野經多壘千門望捷書  
分符矜衛霍起艸愧相如游倦終辭祿成都有弊廬  
其四

仙源藏邑里埃火接江關相別孤城外長瞻積翠間

居人贈馬策游子視刀環莫滯周南客移文勒北山  
送張虞部調常州別駕還婺覲省二首

謫去應吾道流言亦世情聖朝仍得罪佐郡且藏名  
落日梁溪棹平蕪澈水城秋風回首地淚滿逐臣纓  
其二

幸爾遭微譴移官傍故鄉君恩深賈誼郡牧得王  
祥作客才難盡寧親願不忘清時多雨露之子慎風  
霜

仲房將自燕還越都人士固請留之歌以代言  
遂成二闕

何意游燕市猶堪傍酒人窮途唯木葉正馬又風塵  
勞役關何事栖遲信此身五陵諸俠少莫遣報平津

其二

空谷潛夫論通都結客場物情矜去住吾道任行藏  
名馬閑天步幽蘭擅國香維舟當碣石永泮好還鄉

從事 昭陵

帝德彌無極天心睠未央罷朝蒼玉佩厭世白雲鄉  
馮几千秋計承祧七葉光郊關原不夜迴首見扶桑

其二

社稷百無憂閭閻六有秋普天皆正朔異地盡諸侯

露下蒼梧淚雲連白草愁只今遵帝典岳牧舊神州

其三

群靈風雨過出警夜傳呼萬乘臨天路千官拜鼎湖  
中消如宿昔大隧入虛無伏臘兼宵旰勞勞六尺孤

其四

駒隙人間世烏號去後思神遊迴日御哀挽駐雲師  
地紀當三輔天庖奉特祠文園堪卧病奄忽不同時

其五

象衛猶森列龍井竟杳冥秋風悲楚些暮雨泣湘靈  
祖道人煙白巖更鬼火青明朝趨曉漏寥落自晨星



其六

好在中常侍相將近歲寒即看金盞合莫授玉衣卑  
執紼叨從事抽簪擬罷官一抔陵下土涕淚幾時乾  
九龍池

水殿三秋爽山泉九派清尋源迷徑入倚檻忽雲生  
星沫懸河鼓風波動石鯨敢論臨太液或恐象昆明  
山陵事畢登溝溝崖

望望巖栖勝行行澗道廻攀躋從地險豁達忽天開  
朔氣盧龍近秋陰渤海來號弓無處所倚杖有餘哀

其二

息道遠迤盡雲林高下居有蹊皆絕壁無地不精廬  
因欲留僧榻眠看枕佛書明朝車馬客歸路夜何如

其三

伊誰開浩劫未敢問山靈法眼空三界神功自五丁  
經行材竹紫高坐岳蓮青一片頭陀石重來好勒銘  
寄黃金之方景武

劍俠聞多士錐囊見二豪軍聲新露布交態舊錦袍  
價倚連城重歌從擊筑高陳劉才並入鄴下本吾曹  
贈汪博士應辟典武學

談經依大樹獻賦罷長楊筆陣千人敵門徒六郡良

青袍官獨冷紫塞鬢俱蒼篋底陰符在何時按子房  
舍弟困諸生顧有嗜酒放言玩物之癖作詩賦  
之

曾作高陽客山公避後生人間從苛錦天上待騎鯨  
肺病銷狂態顛毛逼老成因思千古士不必酒爲名  
其二

往者潛郎署因之結少年河梁心誓日碣石口談天  
白馬寧無辯青蠅自有權只今仍舌在那得世人憐  
其三

憶昔夸毗子京華競治遊飛黃金作埒浮白玉爲樓

九鼎龍文現三墳鳥跡留含珠如可保長夜照隋侯

其四

以我車前轍爲君座右銘鬢無多日綠眼有幾人青  
國步須騏驎家聲仗鵲錫別來成契濶莫厭太丁寧  
平臺觀獵

平臺開漢地大纛入胡天朔氣吞雲夢谿流抱渭川  
雄飛迴飲羽猛噬應鳴弦豈謂誇胡獵叨逢奉使年  
塞外觀音巖

懸厓探百仞小隊出三臺正喜王庭徙仍看佛土開  
龍沙彌北望鷲嶺接西來倘許胡僧過還應問劫灰

其二

誰拓中原地俄成大士家山泉穿月窟野戍散天花  
洞口三生石城頭五夜笳健兒憑意氣獵火度胡沙  
余夢小女郎錦衣金佩嚮明而拜屏間過庭問  
之爲余姪女既聞舍弟舉一女作詩紀之

舍弟題書至丁年女子生天涯曾見夢堂上早呼名  
袂服天孫錦深居雲母屏歸時傍諸姊門內有逢迎

太函集卷之一百九